

CAÇA CHE NDONDA TAH IHYAN CHE RENTE YE DEVAÇO HEBREO

*Dechuh Dendiohs Daya ye, cah ye, checadino
ihyan iyehñse ndudo yahn ye*

1 ¹Ro menan me ne, ama ndeh yune man, ama nuhn ino Dendiohs man, cah cuande ye ndudo yahn ye ihyan profeta cava che cuahndudo ye, cahnevan ihyan ndico yuhn vo. ²Man adiva ne, dechuh ye Daya ye, ndahco ye nducuahñ dehtenduh tah ye. A nduco ihyan min dendah ye iyehñse. Dechuh ye ihyan, te nduco ihyan min te ye ndudo yahn ye, checadino vo. ³Nduhca yahn che rendihco dave yahn ne, tihca rihco ro ihyan min vederihquentiyon yahn Chida ye. Ihyan min nduco Chida ye ne, dama no ye. Ihyan min ne, numacuahn vederihquentiyon yahn ye, redin ye cudado iyehñse. A ihyan min che nedihve ye yahn nunde yuhn vo, ndaco vo vederenchahco. Tuhme chihnde ye vahchetero lado tah cuaco Dendiohs.

Daya Dendiohs ne, tahque ndinan ye che co nducoyaca ángel

⁴Daya Dendiohs ne, tahque ndinan ye che co nducoyaca ángel, te tahque yudo vederihquentiyon ndahco Dendiohs tah ye. ⁵Tihca, te Dendiohs ne, nde menahn hua rahn ye ri ye nde ama ángel:

Di che Dayá.

Man ro cuh chihco ró che Dayá di.

Nde hua rahn ye yahn nde ama ángel:

Dayá ihyan.

U che Chida ye.

⁶Ate cuahn che dechuh ye Dayá ye che menan iyehñse ne, rahn ye:

Nchuhn, nducoyaca ángel yáhn, cuendeva ne yavenan ye.

⁷Me yahn ángel ne, tuhca rahn ye:

Dín che co nchuhn nduhca vaco man, ruchiyahn man.

⁸Ate yahn Dayá ye ne, rahn ye:

Di Dendiohs, vederihquentiyon yehn ne, hua nda ro che cuihno.

Numa cuaco rihquentiyen.

⁹Renan ine nducuahn che ndah, ne racondah vedame nducuahn che chihnga.

Chemin che u Dendiohs yehn, redín che tahque ri yene che co nducoyaca combiero yehn.

¹⁰Namin rahn ye:

Di Dihve ihyan iyehñse, nde ro menan me ne, dendah iyehñse man, nan ro man.

¹¹Chemin ne, va che cuihno, ate di ne, conen cuahn dama. Nducuahn dehtenduh chemin chan ne, va che co ndico nduhca che ri ndico tino.

¹²Din anduhca che nehn nduco dehtenduh chemin chan, cahnevi anduhneca ndete che ama tino, ne ndacorun. Ate man di, hua nda ro che ndacoron, nde hua nda ro che coh.

¹³Nde menahn hua rahn Dendiohs ri ye nde ama ángel: Cuihnde lado tah cuaco numanahn che ndahco ndiyá ihyan che hua ri rendihche ye di, cava che nevahñecun ye di.

¹⁴Nducoyaca ángel ne, vaco che redin ye ntiyon yahn Dendiohs. Redechuh ye ihyan cava che conan ye ihyan iyehñse che quenan cuma che ndevahn ye.

Hua ndahca che cahcoman vo Ndudo yahn Dendiohs

2 ¹Nducote tahque yudo vederihquentiyon yahn Dihvo vo Jesucristo che co ángel ne, chemin che quenan cuma che cuahtenun ino vo ndudo che a chihñevan vo cava che hua cahcoman vo. ²Tihca, te nducote a chinahn ndudo yahn Dendiohs che dechuh ye nduco ángel a rahn me, ne ihyan che chahcotahn ye yahn ndudo min, chendihco ye nunde, a chi ye

castigo che redin yahn che co ye ne, ³namin uvo ne, hua co ndevahn vo ndete che hua tumacah vo yahn ndudo ndah yahn vederenchahco che rete Dendiohs uvo. Ndudo min ne, a Dihvo vo Jesucristo menan vih cahndudo ye, ne nuhn che chihnevan nuhn ndudo min ne, tumacadino nuhn che cuaco. ⁴Avane ne, ama ndeh nan vederihno din Dendiohs, chihco ro ye che cuaco, nde din ye che chenana cuma vo vederihquentiyon yahn Vaco Ndah yahn ye tunoca che nahn man ye.

***Dihvo vo Jesucristo ne, nda ye muhn
iyehmse cuh, ndaconda ye ihyan***

⁵Vederihquentiyon cuh che rendahconun yan che va che cuhnde ne, hua chihco Dendiohs tah angel. ⁶Hua, te ama canan Ndudo yahn ye dirun ama ihyan tuhca:

Dendiohs, nde hua rigonun chihve ihyan iyehmse cava che necahco ne ihyan.

Nde hua rigonun chihve ye cava che din ne cudado ihyan.

⁷Numanahn min ne, tahque doh vederihquentiyon cah ne ihyan che co angel.

Van nducuahn dehtenduh che dendah ne ne, tahque cah ne vededevano ihyan.

Cah ne vederihquentiyon ihyan cava che cahcantiyon ye nducuahn dehtenduh che dendah ne.

⁸Ndahco ne nducuahn dehtenduh tah ye.

Nducote ndahco Dendiohs nducuahn dehtenduh tah ihyan ne, nducuahn va che cahcantiyon ye. Man ro cuh ne, ametah nevahnecon nducuahn dehtenduh ihyan. ⁹Ate Dihvo vo Jesucristo che cuaco ne, nducote chih ye ne, renevahnecon nducuahn dehtenduh ihyan, rendeva yavenan ye. Numacuahn vedeyahino cahnecon Dendiohs che chih ye cava nducoyaca ihyan iyehmse.

¹⁰Nducuahn dehtenduh ne, yahn Dendiohs. Man ye dendah ye, ne nahn ndeva ye nducoyaca daya ye vahchetero. Chemin che quenana cuma che cah yune ye che chuhrihn Dihvo vo Jesucristo, dinahn ye nducuahn, ndedevahn ye ihyan yahn ye.

¹¹Ihyan che rendevahn ye man, ihyan min che rendedevahn ye ihyan man ne, daya Dendiohs nducoyaca ye. Chemin che Dihvo vo Jesucristo, ihyan min che Daya Dendiohs ne, hua ri cuhnana ye che redin dihno ye ihyan, ¹²nduhca che a ndirun nan Ndudo yahn Dendiohs tuhca:

Nté yahn ne nduco dihnó.

Ca₂tá himno, ndevá yavenān ne vān nducoyāca ihyān yahn ne.

¹³Namin ndirun:

U ne, richahtinó Dendiohs.

Namin ndirun:

Muhn quenún nduco dayá che te Dendiohs u.

¹⁴Nducoyāca ihyān che dihno ye vih ne, dama ndāta yahn ye. Chemin che Dihvo vo Jesucristo ne, ndo ye nduhcā ihyān iyehñse cava che chi chih ye, ndāhco ndiya ye chundah, sahn min che redin se che rinda ihyān, ¹⁵ne ndedevahn ye nducoyāca ihyān che hua va mān chedave yahn ye cuahn dama, vah ye vederih. ¹⁶A devano vo te Dihvo vo Jesucristo ne, ndā ye cava che ndedevahn ye ihyān che ndāta yahn Abraham, ndiyu cava che ndedevahn ye ángel. ¹⁷Chemin che quenān cuma che ndo ye dama nduhcā ihyān iyehñse, tumacadino mān ye nducuahn vederihñ cava che tahque conan cuma ye vedevahino nduco vo, ne cochahtino vo ihyān. Redin ye cudado uvo, rahn nan ye uvo nan Dendiohs, nde chihco mendahn ye ihyān, chih ye cava che nchahco ye nunde yuhn vo. ¹⁸Nducote chuhrihn mān ye, tumarande chundah ihyān ne, tahque nun rendedevahn ye ihyān che retumarande se ihyān.

Vederihquentiyon che quenān cuma Dihvo vo Jesucristo ne, tahque yudo che co vederihquentiyon che quenān cuma Moisés

3 ¹Dihnó che a tendahnun Dendiohs nchuhn, nducote a nedin yahn ye nchuhn ne, cuiquendi ne yune yahn Dihvo vo Jesucristo, ihyān min che dechuh ye ihyān cava che din ye cudado uvo, tihyon yune ye uvo che cotahno vo ihyān. ²Nduhcā che dinahn Moisés yahn Dendiohs vān nducoyāca ihyān yahn ye ne, tihcā dinahn Dihvo vo Jesucristo, ihyān min che ndāhco Dendiohs vederihquentiyon tah ye. ³Dihvo vo Jesucristo ne, redin yahn che tahque rendeva vo yavenān ye che co Moisés. Tihcā, te ihyān che rihno ye ama vah ne, ihyān min che ndeva vo yavenān ye, ndiyu vah me. ⁴Queri ama vah ne, va ihyān che dendah ye. Namin nducuahn che va iyehñse ne, a Dendiohs che dendah ye. ⁵Cuāco te Moisés ne, din ye ntiyon yahn Dendiohs, dinahn ye vān nducoyāca ihyān

yahn ye. Ntiyon che quenán cuma ye ne, che cuahndudo ye ndudo yahn Dendiohs tunoca che reçāh ye ihyan. ⁶Namin Dihvo vo Jesucristo ne, dinahn ye, ate nde tahque yudo vederihquentiyon quenán cuma ye, te nducote ihyan min che Daya Dendiohs ne, ndinān ye vān nducoyāca ihyan yahn ye. Uvo ne, a ihyan yahn Dendiohs uvo, ndete che quendi vo numacuahn vedeyeno cochahtino vo ihyan nde ndā ro che ndeva ye uvo.

Ihyan che cuahtenan ye nān Dendiohs

⁷Nducote tihçā ne, ndāhçā che dinahn vo ndudo che, numacuahn vederihquentiyon yahn Vaco Ndah yahn Dendiohs, a ndirun tuhçā:

Mān che cahnevan nchuhn ndudo yāhn,

⁸hua din cheche ne chedave yahn ne nduhçā che din ihyan ndico yahn ne che chahcotāhn ye yāhn, ducherino ye u cuahn che chahtechica ye yāhn nān che metah duhva.

⁹Ihyan ndico yahn nchuhn ne, hua chitahno ye u, andahre ndihchero ye vederihno che dín nduco ye chete o raco nduyo.

¹⁰Chemin che chí tātān nduco ye, ne ndedecadinó: “Ihyan sih ne, hua richahtino ye u numacuahn chedave yahn ye, nde hua redinahn ye che rihquentiyón.”

¹¹Chemin che chí tātān nduco ye, ne numacuahn vedeyudo chihco dāma inó che hua ndā ro che ndevá ihyan, cuahtenan ye nducó.

¹²Dihnó, cuihco nducoyāca nchuhn cudādo. Hua din cheche ne chedave yahn ne, çāhcomān ne che ritahno ne Dendiohs, ihyan min che va ye vahchetero. ¹³Tahque ndah ne, coyāhve āma tāmā ne vih ro ro, numanahn che chenán ne iyehnse, çāva che nde āma ne hua cahnceh mān ne nchuhn, din cheche ne chedave yahn ne, cuahtendihco ne nunde. ¹⁴Tihçā, te ndā ro che chí Dihvo vo Jesucristo ne, ndeva ye uvo ndete che quendi vo numa ino vo cochahtino vo ihyan, nduhçā che richahtino vo ihyan nde ro che canān chitahno vo ihyan.

¹⁵Nahn che çāhcovan vo nduhçā che yāhve Dendiohs uvo tuhçā:

M̄an che cahnevan nchuhn ndudo yáhn, hua din cheche ne chedave yahn ne nduhc̄a che din ihyan ndico yahn ne che chahcotáhn ye yáhn.

¹⁶Nducoyaca ihyan che ndetendáh Moisés nación yahn Egipto ne, a ihyan chahn che chihnevan ye ndudo yahn Dendiohs, ne chahcotáhn ye. ¹⁷Ihyan che chahtendihco ye nunde, ne chih ye yáhn nan che metah duhva ne, a ihyan chahn che chi tán Dendiohs nduco ye. ¹⁸Ihyan che hua dinahn ye yahn Dendiohs ne, a ihyan chahn che, numacuahn vedeyudo, chihco d̄ama ino Dendiohs che hua nd̄a ro che ndeva ye ihyan, cuahtenan ye nduco ye. ¹⁹A devano vo te hua chi tuno ihyan chahn nan Dendiohs, yahn che hua chitahno ye ihyan.

4 ¹Chemin che numanahn che rete ca Dendiohs ndudo yahn ye che ndeva ye uvo ne, nahn che c̄ahco vo cud̄ado, denan vate ama o vo che hua tuno vo nan ye. ²C̄ah Dendiohs ndudo ndah yahn ye ihyan ndico chahn, ne namin te ye uvo. Ate ihyan chahn ne, nde hua chichihve che chihnevan ye, yahn che hua chitahno ye. ³A uvo che chitahno vo che ndeva Dendiohs uvo, cuahtenan vo nduco ye, te r̄ahn ye yahn ihyan chahn tuhca:

Chemin che chi tán nduco ihyan sih, ne numacuahn vedeyudo chihco d̄ama inó che hua nd̄a ro che ndevá ihyan, cuahtenan ye nducó.

Cuahn che chihno ntiyon yahn Dendiohs che dendah ye iyehñse ne, a va yan ye che ndeva ye ihyan c̄ava che cuahtenan ye nduco ye. ⁴Cuaco chemin, te ama cuan nan Ndudo yahn ye ndirun yahn ro s̄abado tuhca:

Ro s̄abado ne, nducote a nihno ntiyon yahn Dendiohs che dendah ye iyehñse ne, chihnde tuhno ye.

⁵Namin tama cuan nan Ndudo yahn ye ndirun tuhca:

Hua nd̄a ro che ndevá ihyan sih, cuahtenan ye nducó.

⁶Nducote tihca ne, a ndero ndi che a va yan Dendiohs che ndeva ye tama te o ihyan, cuahtenan ye nduco ye. Ihyan chahn che chihnevan ye ndudo ndah yahn Dendiohs menan ne, hua tuno ye nan ye yahn che chahcotáhn ye. ⁷Chemin che chihno ama ndeh nduyo ne, ndaconan yahve Dendiohs ihyan tama yune. Yahn chemin ne, a dirún. Din ye che dirun David tuhca:

M̄an che cahnevan nchuhn ndudo yahn Dendiohs ne,

hua din cheche ne chedave yahn ne.

⁸Nān che ndeva Dendiohs ihyan, cuahtenan ye nduco vih ne, ndiyu yahn nān che ndā Josué nduco ihyan ndico chahn, te ndete che a min ne, ametah ndaconan rahn Dendiohs che ndeva ye ihyan. ⁹Devano vo te comān va che ndeva Dendiohs ihyan yahn ye, ¹⁰te ihyan che ndeva ye ne, cuahte tuhno ye nduhcā che chihnde tuhno mān ye ro che chihno ntiyon yahn ye che dendah ye iyehñse. ¹¹Chemin che nahn che din nun ino vo cava che ndeva Dendiohs uvo. Condi dāma co āma o vo nduco ihyan ndico chahn che hua chitahno ye.

¹²Tihcā, te Ndudo yahn Dendiohs ne, yudo vederihquentiyon yahn, redin che renda ihyan nān ye. Tahque nun ca renda chete chedave yahn ihyan che co āma espada che o can yahn, ne rihco ro vederendedecadino yahn ye. ¹³A Dendiohs che techecade ye yahn ihyan. A ihyan min che dendah ye nducuahn, ne metah nde āma nān dehtenduh che co conun ndeh nān ye. A nān ye va nducuahn.

Dihvo vo Jesucristo ne, nda cuande ye ihyan yahn ye

¹⁴A Dihvo vo Jesucristo Daya Dendiohs, che nda cuande ye uvo. Ihyan min ne, conahn ye vahchetero, rahn nan ye uvo nān Dendiohs. Chemin che nahn che quendi vo numa ino vo cotahno vo ihyan. ¹⁵Dihvo vo Jesucristo ne, tumarande chundah ihyan nān nducuahn, ate hua quendihco ye nde āma nunde. Chemin che, nducote mān ye chuhrihn ye ne, a devano ye nduhcā che rechuhrihn vo, ne renan vahino ye uvo. ¹⁶Mān ne, nahn che dehve rahco vo, covah vo nān Dendiohs yuhn vo, ihyan min che yahino ye uvo, cava che numacuahn vedeyahino mān, vedevahino mān, conan ye uvo cuahn che yah rahno vo.

5 ¹Queri āma chidocuyan ndinan ne, retendahnun Dendiohs ihyan vān ihyan iyehñse cava che cahma nan ye ihyan nān Dendiohs mān, rihno ye ite che co te vedino cava nunde yahn ye mān. ²Chidocuyan chahn ne, nducote ihyan nunde ye nduhcā ihyan chenahn ne, chemin che riquendah ye vedechahtino cava ihyan tundo mān, ihyan che redinda ye mān. ³Va che cahno ye ite che co te vedino cava nunde yahn ihyan yān, ne nducote namin ihyan nunde ye ne, quenān cuma che cahno ye ite che co te vedino cava nunde yahn mān ye.

⁴Nde ama ihyan ne, hua co tendahnun man ye vederihquentiyon min, conan cuma ye. Atenan man Dendiohs retendahnun ye ihyan che rech ye vederihquentiyon min nduhca che cah ye Aarón. ⁵Atihnoca Dihvo vo Jesucristo. Hua tendahnun man ye vederihquentiyon min, quenán cuma ye. Tahque ndah ne, a man Dendiohs tendahnun ye ihyan. Rahn ye ri ye ihyan:

Di che Dayá.

Man ro cuh chihco ró che Dayá di.

⁶Namin rahn ye ri ye ihyan nduhca che ndirun nan Ndudo yahn ye tuhca:

A tendahnún di che co chidocuyan ndinan, cuhnde tah vederihquentiyon nduhca che quenán cuma Melquisedec, ne hua nda ro che cuihno vederihquentiyon yehn.

⁷Cuahn che quechica Dihvo vo Jesucristo muhn iyehne ne, covah ye numa ino ye, nde chaco ye, ne Dendiohs, ihyan min che va vederihquentiyon yahn ye che ndedevahn ye ihyan tah vederih ne, chihcovan ye yahn che ndeva Dihvo vo yavenan ye. ⁸Andahre Daya Dendiohs ihyan ne, ate chi nino ye dinahn ye van nducuahn che chuhrihn ye. ⁹Cuahn che chenán dinahn ye nducuahn ne, chihco mendahn ye ihyan, chih ye cava che, nducoyaca ihyan che cotahno ye ihyan ne, ndevahn ye, ne cuahtenan ye vahchetero numacuahn ro. ¹⁰Tihca, te a tendahnun Dendiohs ihyan che co ye chidocuyan ndinan, cuhnde tah ye vederihquentiyon nduhca che quenán cuma Melquisedec.

Cahnda che cahcoman vo che ritahno vo Dihvo vo Jesucristo

¹¹Ama va ca dehtenduh che nahn te cuandé nchuhn, ate ama vahche che dín che conahn ne yahn che hua rihco ne che conahn ne. ¹²⁻¹³Ametah ro che ritahno nchuhn Dihvo vo Jesucristo, ate ndotenan che man ne cacuahn ne ne, rendotenan ne che ndaconan cacuahn ihyan nchuhn dehtenduh che nde hua vahche nan vederihquentiyon yahn Dendiohs. Nduhca decuah yuno che hua ri che cheh dehtenduh, te deman leche rih ne, tihchan nchuhn. Hua renahn ne vederihquentiyon yahn Dendiohs, nde hua retumacadino ne taca che cuahtechica ne runecade. ¹⁴Ihyan che ndah renahn ye vederihquentiyon yahn Dendiohs ne, a

ihyan chahn che devano tendahnun ye dehtenduh. Riquendi ye cha che ndah, ne rihcoman ye cha che hua ndah.

6 ¹Nducote tihca ne, quendi vo cuahn ndah vo vederihquentiyon yahn Dendiohs cava che conahn ndah vo. Dehtenduh che chahn vo cuahn che cade chitahno vo Dihvo vo Jesucristo ne, ndiyu dechemin dechemin cuahn vo cuahn dama, te ama va ca vederihquentiyon yahn ye che nahn che cuahn vo. Hua deman yahn nduhca che rento ino ihyan nunde yahn ye che redin che rinda ye man, nduhca che ritahno ihyan Dendiohs man, ²nduhca che redenune ihyan man, nduhca che renahn tah ye ihyan, revah ye cava ye man, nduhca che ntuche tenahn man, nduhca che techecade Dendiohs yahn ihyan nunde, din ye castigo ihyan cuahn dama man. Hua deman dehtenduh chemin chan che va che cuahn vo, ³te ama va ca vederihquentiyon yahn Dendiohs che cacuahn nchuhn ndete che cuahnecon ye.

⁴⁻⁶Ihyan che a chenahn ye vederihquentiyon yahn Dendiohs man, ndudo ndah yahn ye man ne, tumacadino ye vedeyahino yahn ye man, vederihquentiyon yahn Vaco Ndah yahn ye man, vederihquentiyon che cuahtenan ihyan vahchetero man. Ndete che cuacondah vedame ye Dendiohs ne, ama yune denda ye, te anduhneca che ndaconan nahn yah ye Dihvo vo Jesucristo, din duche yahn ye ihyan nan nducoyaca ihyan. ⁷Nduhca ama yahn nan che ndahca ran co ne, ndete che ndah ri chendata yahn ihyan ne, nedin yahn Dendiohs yahn min. ⁸Ate ndete che deman chano yan ri ne, din dine ye, nde cahco vih ye cava che cuco.

Richahtino vo Dihvo vo Jesucristo cuahn dama

⁹Dihnó che yahinó nchuhn, a dirún yahn ne nduhca che rahno ihyan che racondah vedame ye Dendiohs, ate a devano cuacó che a ndedevahn ye nchuhn, redin ye che runecade vatechica ne. ¹⁰Dendiohs ne, ndah ye, ne ra cuande ye nduhca che din yahino ne ihyan yahn ye, chinan ne ihyan, nde rinan ca ne ihyan. ¹¹Nahn che quendi nchuhn numa ino ne nduhca che a cochi ne, nde nda ro che chenán ino vo cuahn che ndeva Dendiohs nchuhn. ¹²Hua nahn che din dahnde nchuhn. Tahque ndah ne ne, cuiquendi ne yune yahn ihyan che chitahno ye Dendiohs, ndichahtino ye che ndedevahn ye ihyan nduhca che a necah ye ndudo yahn ye.

¹³Cuahn che çah Dendiohs ndudo yahn ye Abraham ne, çah ye numacuahn vederihquentiyon yahn man ye, te ametah tama ca ihyan che tahque yudo vederihquentiyon yahn ye che co man ye. ¹⁴Rahn ye ri ye Abraham: “Cuaco rahn ri di che ama dín che ndah ndoque, ama dín che co yahn ndata yehn.” ¹⁵Abraham ne, quenan rino ye numacuahn vedeçahntino nde chinahn ndudo che çah Dendiohs ihyan. ¹⁶Ihyan iyehñse ne, cuahn che çah ye ndudo yahn ye ne, rendahconun yan ye Dendiohs, te ihyan min che tahque yudo vederihquentiyon yahn ye. Cuahn che tihça çah ye ndudo yahn ye ne, nde nan che çahma ye, metah. ¹⁷Namin Dendiohs, cuahn che çah ye ndudo yahn ye Abraham ne, çah ye numacuahn vederihquentiyon yahn man ye, chihco ro ye çava ihyan yahn ye che dinahn ye. ¹⁸Tihça çah Dendiohs ndudo yahn ye numacuahn vedeyudo, ne co coçahntino vo ihyan, te redinahn ye ndudo yahn ye. Nducoyaco vo che a ndahco vo chedave yuhn vo tah ye che ndedevahn ye uvo ne, hua dehve rahco vo, te ndedevahn ye uvo nduhça che a necah ye ndudo yahn ye. ¹⁹⁻²⁰Quenan cuma che ndevahn chedave yuhn vo, ametah che ndedecadino vo. A chitahno vo Dihvo vo Jesucristo, ihyan min che va ye vahçetero, rahn nan ye uvo nan Dendiohs çava che co condã vo min. Ihyan min ne, anduhneça ama chidocuyan ndinan che va tah ye vederihquentiyon nduhça che quenan cuma Melquisedec che hua ndã ro che cuihno.

***Va tah Dihvo vo Jesucristo vederihquentiyon
nduhça che quenan cuma Melquisedec***

7 ¹Melquisedec ne, rey yahn yan Salem, namin chi ye ama chidocuyan ndinan yahn Dendiohs, ihyan min che ama yudo vederihquentiyon yahn ye. Cuahn che ndaconan Abraham che çahn ye, cuhn ye nduco ino cun rey çahn, decuihno ye ihyan ne, çahn Melquisedec, chendi yune ye ihyan, ne chica ye che conan Dendiohs ihyan. ²Me Abraham ne, ndahco ye neve dehtenduh che ndaca ye van çanda me tah ihyan min. Nan che ndiche dehtenduh ne, çah ye ama ihyan. Che duçe rey min, Melquisedec ne, tuhça conahn: “Rey ndah.” Namin dihn va nan che chihquentiyon ye, te yan yahn ye, Salem ne, tuhça conahn: “Yan nan che dihn va.” ³Ihyan min ne, anduhneça ndete che co man ye, te hua duh

devano duh che chaco ye mañ, duh che chida ye mañ, nde hua duh devano ti chica ndata yahn ye. Hua duh devano ticuahn chihndeyan ye mañ, ticuahn chih ye mañ, ndete che chihno vederihquentiyon yahn ye mañ. Atihnoca Dihvo vo Jesucristo, Daya Dendiohs, te ndi ye anduhneca chidocuyan ndinan, ne hua cuihno vederihquentiyon yahn ye.

⁴A ndero ndi te ama yudo vederihquentiyon quenán cuma Melquisedec, te nde ihyán ndico yuhn vo Abraham nevahnecon ye ihyán, ne ndeh nan dehtenduh che chihnevi ye yahn rey chahn, ndahco ye tah ye. ⁵Nduhca che rihquentiyon ley che dirun Moisés ne, va che cah ihyán nación yahn Israel ama dehtenduh nan che ndiche queri ama nan dehtenduh yahn ye che va, ndonda tah chidocuyan che ndata yahn Leví. Tihca va che din ye, te ndata yahn Abraham ihyán nduco vih. ⁶Ate Melquisedec ne, andahre hua ndata yahn Leví ihyán ne, ndonda tah ye dehtenduh che cah Abraham, ihyán min che cah Dendiohs ndudo yahn ye ihyán. A Melquisedec che chica ye che conan Dendiohs Abraham, ⁷ne a devano vo te ihyán che rica ye Dendiohs cava ihyán chenahn ne, tahque yudo vederihquentiyon quenán cuma ye. ⁸A ndero ndi che tahque yudo vederihquentiyon che quenán cuma Melquisedec che co vederihquentiyon che chahtenan cuma chidocuyan che ndata yahn Leví. Ihyán chahn ne, chihno chih ye, ate Melquisedec ne, a ndirun yahn ye nan Ndudo yahn Dendiohs anduhneca ndete che va ca ye. ⁹⁻¹⁰Leví nduco nducoyaca chidocuyan che ndata yahn ye ne, anduhneca ndete che nduco ye Abraham, ndeva ye yavenan Melquisedec, te andahre ametah ye ro min, ate Abraham che chihco ndata ye ihyán.

¹¹Chidocuyan che ndata yahn Leví, che namin ndata yahn Aarón ne, ihyán chahn che chihnde tah ye ley che dirun Moisés, chicuahn ye ihyán nación yahn Israel. Ate nducote hua ndevahn ihyán nduco vederihquentiyon che chahtenan cuma chidocuyan che ndata yahn Leví ne, quenán cuma che dechuh Dendiohs Dihvo vo Jesucristo, nuhnde tah ye vederihquentiyon nduhca che quenán cuma Melquisedec. ¹²Che ndacorun Dendiohs vederihquentiyon yahn chidocuyan ne, nde ley yahn ye va che ndahco cade ye. ¹³Tihca, te Dihvo vo Jesucristo ne, ndiyu ndata yahn chidocuyan ihyán. ¹⁴A devano cuaco vo te nan ndata yahn Judá cochi ndata yahn

ye. Namin a devano vo nduhcā che chihquentiyon Moisés che atenan nān ndata yahn Leví quendāh chidocuyan.

¹⁵Nducote nuhnde t̄ah Dihvo vo Jesucristo vederihquentiyon nduhcā che quenān cuma Melquisedec ne, a ndero ndi che a ndāhco cāde Dendiohs ley che dirun Moisés, ¹⁶te nuhnde t̄ah ye vederihquentiyon min, ndiyu yahn che ndata yahn chidocuyan ihyan, ate yahn che quenān cuma ye vederihquentiyon che hua ndā ro che cuihno. ¹⁷Tihcā, te a yahn ihyan min che ndirun nān Ndudo yahn Dendiohs tuhcā:

A tendāhnún di che co chidocuyan ndinān, cuhnde tah vederihquentiyon nduhcā che quenān cuma Melquisedec, ne hua ndā ro che cuihno vederihquentiyon yehn.

¹⁸Nduco tihcā, ndāhco cāde Dendiohs ley che dirun Moisés, te hua cochihve ¹⁹cāva che ndedevahn ihyan. Menun ley min ne, ndā Dihvo vo Jesucristo che tahque ndah vederihquentiyon yahn ye. Ihyan min cochahtino vo ihyan cāva che tuno vo nān Dendiohs.

²⁰Avāne ne, cuahn che dechuh Dendiohs Dihvo vo Jesucristo ne, numacuahn vedeyudo cāh ye ndudo yahn ye che co ye nduhcā chidocuyan ndinān. ²¹Yahn chidocuyan chenāhn chahn ne, hua tihcā cāh ye ndudo yahn ye. Cuahn che ndāhco ye vederihquentiyon min t̄ah Dihvo vo ne, cāh ye ndudo yahn ye che ndirun tuhcā:

Dihvo vo Dendiohs ne, numacuahn vedeyudo cāh ye ndudo yahn ye, ne va che conahn.

Rāhn ye ri ye Dāya ye: “A tendāhnún di che co chidocuyan ndinān, cuhnde tah vederihquentiyon nduhcā che quenān cuma Melquisedec, ne hua ndā ro che cuihno vederihquentiyon yehn.”

²²Nducote a Dihvo vo Jesucristo che nuhnde t̄ah ye vederihquentiyon min ne, conahn ndudo che chihco cāde Dendiohs cāvo vo. Ndudo min ne, tahque ndah che co ley che chihnde a rāhn me. ²³Chidocuyan chahn ne, yāhn ye chahtenan ye nān ntiyon, te nducote ihyan iyehnse ye ne, ca rih ye ca rendacorun ye. ²⁴Ate Dihvo vo Jesucristo ne, cuhnde t̄ah ye vederihquentiyon min cuahn dāma, te hua ndā ro che coh ye. ²⁵Chemin che ihyan che tuno ye nān Dendiohs cāva ye ne, ndedevahn ye ihyan, ne ametah conda ye, te va ye cuahn dāma, rāhn nan ye ihyan nān Dendiohs.

²⁶Ama chidocuyan nduhca ihyan min che rendotenan vo. Ihyan min ne, ndah ye, ne metah nde ama nunde yahn ye. Hua dama ri ye nduco ihyan nunde. Ndeva Dendiohs yavenan ye, ndeva ye ihyan vahchetero. ²⁷Chidocuyan ndinan chenahn chahn ne, rendotenan ye che cahno ye ite cuahn dama, co te vedino cava nunde yahn man ye man, nunde yahn ihyan man. Ate Dihvo vo Jesucristo ne, chihco mendahn ye ihyan, chih ye, ne nduco chemin ama yune no nedihve ye nunde yahn ihyan iyehense. ²⁸Chidocuyan ndinan chenahn chahn che chihnde tah ye ley che dirun Moisés ne, ihyan nunde ye. Ate cuahn che ndahco cade Dendiohs ley min ne, numacuahn vedeyudo ndahco ye vederihquentiyon tah Daya ye, ihyan min che hua nda ro che condihco ye nunde.

***Nuhnde tah Dihvo vo Jesucristo vederihquentiyon
ra che ndahco cade Dendiohs***

8 ¹Dihvo vo Jesucristo ne, ndi ye nduhca ama chidocuyan che tahque ndinan, rahn nan ye uvo, va ye vahchetero lado tah cuaco Dendiohs. Ndudo cuh che tahque menan vihca van nducuahn che a dirun nan caca cuh. ²Chidocuyan che tahque ndinan che chahte ye iyehense ne, chahtenun ye chete yaco che dendah ihyan. Ate Dihvo vo Jesucristo ne, va ye vahchetero. Min ne, ndiyu ihyan iyehense dendah ye. ³Chidocuyan chahn ne, chenana cuma ye ntiyon che rihco ye ndeh nan vedino nan ta. Ate Dihvo vo Jesucristo ne, chihco mendahn ye ihyan, chi ye vedino cavo vo. ⁴Ndete che muhn iyehense quenana Dihvo vo ne, nde hua conan ye nan ntiyon che redin chidocuyan che rihco ye vedino nan ta nduhca che rihquentiyon ley che dirun Moisés, te a ihyan chahn che nda cuande yahn ye ntiyon min. ⁵Ihyan chahn ne, redin ye ntiyon chete yaco che ndedendah ihyan menun vahchetero nan che va Dendiohs. Devano vo che menun, te cuahn che canan Moisés dendah ye yaco me ne, rahn Dendiohs, ri ye ihyan: “Cuihque cudado, ne cuedendah nducuahn nduhca che nahme di tingüete me.” ⁶Chidocuyan chahn ne, muhn iyehense cuh che va ntiyon yahn ye. Ate Dihvo vo Jesucristo che ndi ye anduhneca chidocuyan che rahn nan ye uvo nan Dendiohs ne, tahque chahte vederihquentiyon yahn ye che co vederihquentiyon yahn ihyan chahn, te tahque

ndah vederihquentiyon che ndahco çade Dendiohs che co vederihquentiyon ndico me man, tahque ndah ndudo che te ye uvo che co ndudo che çah ye ihyan ndico yuhn vo man.

⁷Vederihquentiyon ndico me ne, hua quendaḥ ndah, ne chemin che ndaconan ndahco çade ye. ⁸Nducote ndihchero Dihvo vo Dendiohs che hua redinahn ihyan vederihquentiyon ndico me ne, raḥn ye:

Caviyan deman ne, ndahco çade ndudo yahn nduco ihyan nación yahn Israel man, ihyan nación yahn Judá man.

⁹Ndahco çade ndudo che çah ihyan ndico yahn ye cuahn che chinán ihyan, ndetendāḥ ihyan nación yahn Egipto. Ihyan chahn ne, hua dinahn ye vederihquentiyon che çah ihyan, ne chemin che chaondaḥ vedamé ihyan.

¹⁰Nda ro yahn ne, ndahco çade ndudo yahn nduco ihyan nación yahn Israel.

Dín che conahn ye vederihquentiyon yahn, ne hua conan ye.

Tuhme nedin yahn ihyan, ne ndeva ye yavenan.

¹¹Nda ro min ne, hua rendotenan che cacuahn vih ye van dihno ye man, van combiero yahn ye man, çava che tumacadino ye vederihquentiyon yahn, te tumacadino nducoyaca ihyan, nde ihyan ndico man, nde cheçahya man.

¹²Nchahcó yahn ye, ne ametah ndaconan conun inó nunde yahn ye.

¹³Nducote raḥn Dendiohs che a ndahco çade ye vederihquentiyon yahn ye ne, a devano vo che a chuh ro yahn vederihquentiyon ndico me, a chihcoman ye.

9 ¹Ihyan ndico yuhn vo ne, chihnde taḥ ye vederihquentiyon ndico nan che ndihco çade Dendiohs nduhça che quenán cuma che ndeva ihyan yavenan ye. Namin chihnde taḥ ye ama yaco che dendah ye. ²Nan derenda chete yaco me ne, duche Nan Ta Yudo. Min va candelero man, mesa nan che retave pan che ri vedino man. ³Mendaḥn chete yaco ne, quendihco ama tino chahte numa chahno. Cuahn candevah vedame tino me ne, duche Nan Ta Che Tahque Yudo. ⁴Min va ama nan ta diyahnguan nan che riche cuhn. Namin va ama yave che ndacotuma diyahnguan. Chete ne, chenun tu rahno nan che ndirun vederihquentiyon

yahn Dendiohs mān, quenun āma jarro che ndinda nduco diyahnguan nān che chenun pān che duche maná mān. Namin quenun nducodi che neve, che quenun cuma Aarón. ⁵Menān yave me ne, a min che nān ta nān che rihnde vedino cava nunde yahn ihyān. Min vatendi o ángel che ndindah ye, ne chendāh reche ye. Āma quendihco yudo min, te min riya Dendiohs. Conāhn nān vo muhn che rente vo yahn nān ta me. ⁶Tihcā va yān nducuahn chete yaco me, ne chidocuyān chahn ne, rendā ye cuahn dāma nān ta nān derendā me, redinahn ye ntiyon che chenān cuma ye. ⁷Ate Nān Ta che Tahque Yudo me ne, atenān chidocuyān che tahque ndinān me rendā ye āma yune no che āma nduyo. Queri āma yune che condā ye ne, va che quenda ye yun yahn ite cava che co vedino yahn nunde yahn mān ye mān, nunde yahn nducoyāca ihyān mān. ⁸Nduco chemin ne, rete Vaco Ndah yahn Dendiohs, recadino vo te numanahn che va ca vederihquentiyon ndico me ne, nduhcā che quendihco tino mendāhn chete yāco, ne hua co condā adecoduhno ihyān Nān Ta Che Tahque Yudo me ne, tihcā hua co tuno ihyān vahchetero. ⁹Yahn tino che quendihco chete yāco ne, a ndero ndi che rihco vih ihyān nān Dendiohs ro min cuahn che va ca vederihquentiyon ndico me. Nde āma nān dehtenduh vedino che recāh ihyān Dendiohs ro min ne, hua co din che cuahtemān ino ye. ¹⁰Vederihquentiyon min ne, chihnde cava che co devano ihyān dehtenduh che co cheh ye mān, cuh ye mān, taçā che nāno ye taḥ ye mān, dehtenduh yahn ye man, ne chengu nde dechuh Dendiohs Dihvo vo Jesucristo, ndāhco çade ye. ¹¹Cuahn che ndā Dihvo vo ne, ndi ye nduhcā āma chidocuyān che tahque ndinān, nda ye vederihquentiyon ra che tahque ndah. Chihno min ne, conāhn ye vahchetero. Chidocuyān che tahque ndinān chahn che chihnde taḥ ye vederihquentiyon ndico me ne, din ye ntiyon chete yāco che ihyān dendāh ye. Ate Dihvo vo Jesucristo ne, vahchetero va Ye. ¹²Chidocuyān che tahque ndinān chahn ne, nduyo nduyo rendotenan ye yun yahn chivāto mān, itenine cahya mān, cava che co vedino yahn nunde yahn ihyān. Ate Dihvo vo Jesucristo ne, chihco mendāhn ye ihyān, ne nduco yun yahn mān ye nedihve ye nunde yuhn vo. Āma yune no ndedevahn ye uvo, conāhn ye vahchetero nān Dendiohs. ¹³Nān vederihquentiyon ndico me ne, richihve yun yahn

chiyato man, itenine man iya yahn itenine che ndihquiyahn ye ite man, cava che co vedino, ne cuhndeman ino ihyan che cahnda yahn ye che conda ye chete yaco. ¹⁴Ate nde tahque richihve yun yahn Dihvo vo Jesucristo, ihyan min che metah nde ama nunde yahn ye. Ihyan min ne, numacuahn vederihquentiyon yahn Vaco Ndah yahn Dendiohs, chihco mendahn ye ihyan, chih ye cava che ndaco vo vederenchahco yahn nunde yuhn vo, ndevahn vo. Man ne, hua dehve rahco vo, redinahn vo vederihquentiyon yahn Dendiohs, ihyan min che va ye vahchetero.

¹⁵Nducote chih Dihvo vo Jesucristo, chera yun yahn ye ne, va tah ye vederihquentiyon ra, rahn nan ye uvo nan Dendiohs. Chemin che ihyan che a tendahnun Dendiohs ne, cuahtenan ye vahchetero numacuahn ro nduhca che cah Dendiohs ndudo yahn ye. Nducote chih Dihvo vo ne, ndedevahn ye uvo, te cava ihyan min nchahco Dendiohs nunde yuhn vo che hua dinahn vo vederihquentiyon yahn ye che chihnde ro menan. ¹⁶Testamento che rihco ihyan ne, ndete che nuhnde cuaco che a chih ye ne, conahn. ¹⁷Ate ndete che va ca ye ne, hua co conahn. ¹⁸Vederihquentiyon che rihco cade Dendiohs ne, va che cora yun cava che conahn. ¹⁹Chemin che cuahn che chihno cahndudo Moisés vederihquentiyon che cah Dendiohs ihyan, chihnevan nducoyaca ihyan yan ne, chetah ye ama tihve yudo yahn itecuche che necah cuah nduco ama ticua yata che duche hisopo, ne decahnda ye nduco yun yahn itenine cahya man, yun yahn chivato man, che ndihchetahn nduco nune. Tuhme cahnan ye yun me nan libro che ndirun vederihquentiyon min man, chinun ye van nducoyaca ihyan man, ²⁰ne rahn ye: “Nduco yun cuh, conahn vederihquentiyon yahn Dendiohs che te ye uvo.” ²¹Namin cahnan ye yun me chete yaco man, nan dehtenduh che va min man. ²²Nan vederihquentiyon yahn Dendiohs che dirun Moisés ne, a nahn nducuahn dehtenduh va che co vihco nduco yun yahn ite. Namin va che coh ite, cora yun yahn te cava che nchahco Dendiohs nunde yahn ihyan.

Chih Dihvo vo Jesucristo cava nunde yuhn vo

²³Yaco nan che chihnde vederihquentiyon ndico min ne, chihnde menun vahchetero. Ndeucuahn dehtenduh che va

chete yaco min ne, rendotenan yun yahn ite cava che co vihco. Ate cava che tuno vo vahchetero nan va Dendiohs ne, hua cochihve yun yahn ite. ²⁴Chidocuyan ndinan chahn ne, atenan chete yaco min chihnde vederihquentiyon yahn ye. Ate tahque yudo vederihquentiyon yahn Dihvo vo Jesucristo, te vahchetero va ye, rahn van ye uvo nan Dendiohs. ²⁵Chidocuyan chahn ne, nduyo nduyo renda ye Nan Ta Che Tahque Yudo, ne rendotenan ye yun yahn ite cava che co vedino. Ate Dihvo vo Jesucristo ne, ama yune no chih ye, chera yun yahn ye cava nunde yuhn vo. ²⁶Nde nan canan iyehense ne, ama yahn ite quenana cuma che chihno ihyan ndico yuhn vo, chi te vedino. Ate nda ro che ndahco cade Dendiohs vederihquentiyon yahn ye ne, nda Dihvo vo Jesucristo, chihco mendahn ye ihyan, chih ye ama yune no, cava che nchahco Dendiohs nunde yuhn vo. ²⁷Nducoyaca ihyan iyehense ne, a nihnde cade che va che coh ye. Adiva ne, va che techecade Dendiohs yahn ye. ²⁸Dihvo vo Jesucristo ne, chih ye ama yune no, nedihve ye nunde yahn ama yahn ihyan. Nda ro yahn ne, ndaconan chi tun ye, ndiyu cava che coh ye tama yune cava nunde, ate cava che ndeva ye ihyan che numa ino ye chenana rino ye ihyan.

10 ¹Vederihquentiyon che ndahco cade Dendiohs ne, tahque ndah che co vederihquentiyon che chihnde tah Moisés. Nan vederihquentiyon ndico me ne, hua tuno ihyan nan Dendiohs, andahre nduyo nduyo recah ye vedino cava nunde yahn ye. ²Ndete che ndaca ihyan chahn vederenchahco cava nunde yahn ye ama yune no ne, ametah rendotenan che ndaconan cah ye vedino. Ate hua nchahco Dendiohs nunde yahn ye ama yune no, ne chemin che hua rihndeman ino ye, redin nunde yahn ye. ³Nduyo nduyo che recah ye vedino ne, renecahco ye che chendihco ye nunde, ⁴te yun yahn itenine man, yun yahn chivato man ne, hua co din che ama yune no ndaca ihyan vederenchahco cava nunde yahn ye.

⁵Chemin che cuahn che nda Dihvo vo Jesucristo iyehense ne, rahn ye ri ye Dendiohs:

Hua renana ino ne che rihno ihyan ite, ri te vedino nan ne. Tahque ndah ne ne, din ne che ndo nduhca ama ihyan iyehense, cahco mendahn u coh, nedihve nunde yahn ihyan.

⁶ Hua renan ino ne che rihno ye ite, rihquiyahn ye ite, ri te vedino cava che nchahco ne nunde yahn ye.

⁷ Dendiohs yahn, nducote hua renan ino ne dehtenduh vedino chemin chan ne, a nda muhn iyehnse cava che dinahn che rihquentiyon ne nduhca che a ndirun yahn nan Ndudo yahn ne.

⁸ Dinoca rahn Dihvo vo Jesucristo che hua renan ino Dendiohs dehtenduh vedino che recah ihyan cava nunde yahn ye andahre nan vederihquentiyon ndico a nihnde cade che va che cah ye. ⁹ Tuhme rahn ye: “A nda muhn iyehnse cava che dinahn che rihquentiyon ne.” Nduco che tihca rahn ye ne, chihco ro ye che a nuhnde cade vederihquentiyon ndico me, te chihco mendahn ye ihyan menun vedino che recah ihyan ro menan. ¹⁰ Nan vederihquentiyon che ndahco cade Dendiohs ne, nchahco ye nunde yuhn vo yahn che chihco mendahn Dihvo vo Jesucristo ihyan, chih ye ama yune no, ndedevahn ye uvo.

¹¹ Nan vederihquentiyon ndico me ne, va che cahco chiducuyan chahn vedino ro ro, ate vedino chemin chan ne, hua redin che ndaca ihyan vederenchahco cava nunde yahn ye ama yune no. ¹² Ate Dihvo vo Jesucristo ne, chih ye, nedihve ye nunde yuhn vo ama yune no. Chihno min ne, conahn ye vahchetero, chihnde ye lado tah cuaco Dendiohs. ¹³ Min quenán rino ye nde nda ro che ndahco ndiya Dendiohs ihyan che hua ri rendihche ye ihyan, nevahnecon ye ihyan. ¹⁴ Ihyan min ne, ama yune no ndedevahn ye ihyan yahn ye, chihco mendahn ye ihyan, chih ye cava ye. ¹⁵ Cuaco chemin, te namin din Vaco Ndah yahn Dendiohs che dirun ihyan profeta tuhca:

¹⁶ Rahn Dihvo vo Dendiohs: “Nda ro yahn ne, ndahco cade ndudo yahn nduco ihyan yahn.

Din che conahn ye vederihquentiyon yahn, ne hua conan ye.”

¹⁷ Namin rahn ye:

Nchahco yahn ye, ne ametah ndaconan conun ino nunde yahn ye.

¹⁸ Cuahn che a nchahco Dendiohs nunde yahn ihyan ne, ametah rendotenan che cah ca ye vedino.

Nahn che cochahtino vo Dendiohs

¹⁹ Dihno, nan vederihquentiyon ndico me ne, nde ama ihyan yan hua co nda ye Nan Ta Che Tahque Yudo. Ate nan

vederihquentiyon ra ne, nducote a chih Dihvo vo Jesucristo, chera yun yahn ye, nedihve ye nunde yuhn vo ne, hua dehve rahco vo, co tuno vo vahchetero nan Dendiohs. ²⁰Nan vederihquentiyon ndico me ne, quendihco tino me chete yaco cava che hua chuh ihyan, nda ye Nan Ta Che Tahque Yudo me. Ate nan vederihquenityon ra che va tah Dihvo vo Jesucristo ne, co tuno vo vahchetero nan Dendiohs, te chihco mendahn ye ihyan, chih ye cavo vo. ²¹Nducote ndi Dihvo vo Jesucristo nduhca ama chidocuyan che tahque ndinan, rahn nan ye uvo ihyan yahn Dendiohs ne, ²²chemin che ndahco vo chedave yuhn vo tah Dendiohs. Hua dehve rahco vo, te ritahno vo Dihvo vo Jesucristo numa ino vo. A ndaco vo vederenchahco cava nunde yuhn vo. A chedenune vo, ne man ne, anduhneca ndete che a ndo dave vo nduco nune dave. ²³Quendi vo numa ino vo cohahtino vo che ndeva Dendiohs uvo, te dinahn ye ndudo yahn ye che te ye uvo. ²⁴Nahn che necah yan ama tamo vo chedave yahn vih cava che quendi vo din yahino vih vo man, din vo che ndah man. ²⁵Hua cahcoman vo che rendo damo vo nduco vih nduhca che redin nahn dihno vo che rihcoman ye. Tahque ndah ne, quendi vo nde tahque numa ino vo necah yan ama tamo vo chedave yahn vih, te a cochi nino ro che ndaconan chi Dihvo vo Jesucristo.

²⁶Ndete che a chenahn vo ndudo ndah yahn Dendiohs, ne cuahcotahn vo ne, tuhme ametah nchahco ye yuhn vo. Ndete che cuahcotahn vo ne, metah nguahco yuhn vo che chih Dihvo vo Jesucristo. ²⁷Hua co cuahteman ino vo, te va che cuhnde cade yuhn vo, co vo castigo yah van ruchiyahn dama nduco ihyan che hua ri rendihche ye Dendiohs. ²⁸Nducoyaca ihyan che rahcotahn ye yahn vederihquentiyon che dirun Moisés ne, ndete che ndahco cuaco o ino ihyan nunde yahn ye ne, va che cahno ihyan yan ihyan, ametah vederenchahco cava ye. ²⁹Ihyan che a chenahn ye Ndudo yahn Dendiohs ne, ndete che cuacondah vedame ye Daya Dendiohs man, ndete che duche rino ye vederihquentiyon yahn Dendiohs che chih Daya ye, chera yun yahn ye cava che ndedevahn ye ihyan iyehse man, ndete che cuahcotahn ye yahn Vaco Ndah yahn Dendiohs, ihyan min che yahino ye ihyan man ne, tuhme tahque chahte castigo va che co ye che co ihyan chahn. ³⁰Ihyan che tihca redin ye ne, hua co ndevahn ye, te

rahn Dendiohs: “U dín castigo ihyan nunde, ndahco menún yahn ye.” Namin rahn ye: “Ihyan yáhn ne, u che Dihve ye. U techecadé yahn ye.” ³¹¡Ama cahnda yuhn vo che cuahtendihco vo nunde nan Dendiohs, ihyan min che va ye vahchetero!

³²Cuenecahco nchuhn cuahn che cade chihnevan ne ndudo ndah yahn Dihvo vo Jesucristo, chitahno ne ihyan. Ama quendah ne vedechahtino che ama din tan ihyan nduco ne.

³³Nahn cuan ne, din duche yahn ye nchuhn, chahn ye nchuhn nan nducoyaca ihyan. Nahn cuan ne, ama chi ran ne che chahn ihyan combiero yahn ne che nduco ne man, ³⁴din ne vedevahino nduco combiero yahn ne che chahtenun ye vacoyahn man.

Din chahtino ne, nde hua chi ran ne yahn che chehnevinan ihyan dehtenduh yahn ne, te a devano ne che nuhnde menun yahn ne vahchetero dehtenduh che nde tahque ndah, che ngu cuahn dama. ³⁵Chemin che nahn che quendi ne cochahtino ne. A devano ne che ndahco menun ndahva Dendiohs yahn ne.

³⁶Nahn che cuahtenan cuma ne vedechahtino cava che dinahn ne vederihquentiyon yahn ye, ne ndeva ye nchuhn nduhca che te ye ndudo yahn ye. ³⁷Nan Ndudo yahn ye ne, a ndirun tuhca:

A nun cuahn nda ihyan min che a va cade che chi ye.

Ametah condah ye.

³⁸Ihyan che ritahno ye u ne, nedin yáhn ihyan.

Va che quendi ye cochahtino ye u, te ndete che cahcoman ye u ne, cuacondah vedame ihyan.

³⁹Uvo ne, ritahno vo Dendiohs, ne chemin che ndichahtino vo che ndeva ye uvo. Hua dama co vo nduco ihyan che racondah vedame ye Dendiohs, ne rinda ye.

Nduhca che ritahno ihyan Dendiohs

11 ¹ Che ritahno vo che ndeva Dendiohs uvo ne, chenán ino vo che va che conahn. Andahre condah conahn, ate nducote ritahno vo ihyan ne, a devano vo te va che conahn. ² Tihca, te ihyan ndico yuhn vo ne, nedin yahn Dendiohs ihyan yahn che chitahno ye ihyan.

³ Nducote ritahno vo Dendiohs ne, a devano vo te man ye dendah ye iyehense. Andahre metah dehva ro menan, ate chihquentiyon no ye, ne chihnde ro.

⁴ Abel ne, chitahno se Dendiohs, ne chemin che cah se ihyan ama vedino che tahque ndah che co che cah Caín. Nducote

chitahno se ihyan ne, nedin yahn ye sahn, nevahneecun ye vedino yahn se. Sahn min ne, a ndih se, ate nducote chitahno se Dendiohs ne, nde meniyon retihyon yune se uvo che cotahno vo Dendiohs nduhca che chitahno se.

⁵Enoc ne, chitahno ye Dendiohs, ne chemin che ndeva ye ihyan vahchetero dequenduche ye. Ametah ndaca ndihchero ihyan iyehense ihyan. Nan Ndudo yahn Dendiohs ne, a ndirun yahn Enoc, che cuahn che quenan ye iyehense ne, ndahca quenan ye nan Dendiohs, ne nedin yahn Dendiohs ihyan.

⁶Cava che tuno vo nan Dendiohs ne, va che cotahno vo ihyan, te ihyan che ritahno ye che va ye man, che rah ye ihyan man ne, atenan ihyan chahn che rendeva ye ihyan.

⁷Noé ne, chitahno ye Dendiohs, ne chemin che dinahn ye, dendah ye arca me cuahn che cahñ Dendiohs chi ye ihyan che va che ndedetoh ye iyehense. Chete arca me quenun ye nduco ihyan yahn ye, ndevahn ye. Nducote chitahno ye ndudo min yahn dehtenduh che coman cochi che co ne, chihco ro ye che ihyan nunde ne, a ndinda ye yahn che hua chitahno ye. Namin nducote chitahno ye ne, nedin yahn Dendiohs ihyan.

⁸Abraham ne, nducote chitahno ye Dendiohs ne, dinahn ye cuahn che yahve ye ihyan che cahñ ye yahn yahn nan che cah ye ihyan. Andahre nde hua devano ye ti quenda Dendiohs ihyan, ate chihcoman ye yan vaco ye, cuahn ye. ⁹Nducote chitahno ye Dendiohs ne, quenan ye yahn min, andahre tama naci3n. Quenun ye vah tino nduhca ihyan chenun ye yune. Tihca quendi Isaac man, Jacobo man, che namin nduco ye cah Dendiohs ndudo yahn ye ihyan. ¹⁰Tihca din Abraham, te quenan rino ye che ndeva Dendiohs ihyan vahchetero, nan che ama ndahca, nan che man Dendiohs dendah ye.

¹¹Namin ihyan ndahta yahn ye Sara ne, chitahno ye Dendiohs, ne andahre indihnte cuahn ye, ate chichahtino ye che conahn ndudo yahn Dendiohs, ne chemin che ndaca ama daya ye nduhca che cah Dendiohs ndudo yahn ye ihyan. ¹²Min quendinan che ama chi yahn ndata yahn Abraham, andahre a indihnte cuahn ye ro min. Nduhca che ndeh iyon che chenan nan ro man, nduhca che ndeh yahndute che chetave chihto nuniyahn man, che nde hua cocha vo din ducho vo ne, tihca ama chi yahn ndata yahn ye.

¹³Nducoyaca ihyan ndico chahn ne, chih ye. Numanahn che chahtenan ca ye iyehense ne, hua chenan chinahn nduco ye

nducuahn dehtenduh che çah Dendiohs ndudo yahn ye ihyan. Ate chichahtino ye che va che conahn nducuahn, ne chi yeno ye, te a devano ye te ndiyu iyehñse cuh va che cuahtenan ye cuahn ðama. Redin ye cuande che anduhñeçá ihyan chenun yune ye, te a devano ye che neve ro no cuahtenan ye iyehñse, tuhme ndeva Dendiohs ihyan. ¹⁴Nducote redin ye cuande che anduhñeçá ihyan chenun yune ye ne, rihco ro ye che chenano ino ye che cuahtenan ye vahchetero. ¹⁵Ndete che ndedecadino ye yahn yan vaço ye che chihcoman ye ne, a ndaconan ca ye. ¹⁶Ate hua tihçá din ye, te tahque ndah ye ne, chahtenan ino ye che ndá ye vahchetero. Chemin che nedin yahn Dendiohs ihyan numa ino ye, ne chihco yan ye vahchetero çava ye.

¹⁷⁻¹⁸Cuahn che ndihchenan Dendiohs Abraham ne, nducote chitahno Abraham ihyan ne, dinahn ye yahn ye, ne quenda ye ðaya ye Isaac çava che çahno ye sahn, co se vedino nduhçá che chihquentiyon ye. Ama ndiyahn ra sahn min yahn ye, ate a chihquino ye che çahno ye sahn, andahre a neçah Dendiohs ndudo yahn ye ihyan che a sahn min çahco ndata se ndata yahn ye. ¹⁹A devano ye te Dendiohs ne, nde tenahn ri rendedetuhche ye. Che laço yahn Abraham ne, anduhñeçá ndete che ntuche se van tenahn, te a va che coh se che rahco ye.

²⁰Isaac ne, chitahno ye Dendiohs, ne chemin che chica ye ihyan che conan ye ðaya ye Jacob man, Esaú man, din ye che ndahçá cuahtenan se. ²¹Jacob ne, chitahno ye Dendiohs, ne chemin che cuahn che a ndá nino ro che coh ye ne, chica ye ihyan che conan ye queri ama ðaya José, din ye che ndahçá cuahtenan se. Chihno min ne, quendih ndudo ye indahco yahn ye, ndeva ye yavenan Dendiohs. ²²José ne, chitahno ye Dendiohs, ne chemin che, cuahn che ndá nino ro che coh ye ne, rahn ye ri ye ihyan nación yahn ye Israel, che adiva ne, va che ndaça ye nación yahn Egipto. Namin chihquentiyon ye ihyan chahn che ndá ro min ne, ndiquenda ye ine yahn ye.

²³Indihte yahn Moisés ne, chitahno ye Dendiohs, ne chemin che cuahn che chihndeyan Moisés ne, tihyon ndeh ye sahn ino iyo. Chichahtino ye Dendiohs che ndedevahn ye sahn çava che hua çahno sandado sahn nduhçá che ndihquentiyon rey yahn Egipto, te ndihchero ye che ama ndahçá se. ²⁴Moisés ne, chitahno ye Dendiohs, ne chemin che cuahn che a chi

mañh ihyan ye ne, tehche ino ye tañh ðaya rey me che din ðaya te ihyan. ²⁵Ndotenan che quendi ye vedeyeno yahn mañ ye numanahn che quenan ye iyehñse, condihco ye nunde ne, quenan ino ye, ndo nduco ye ihyan yahn Dendiohs, chuhrihn ye nduco vih. ²⁶Tahque ndah ye ne, chihcomañ ye nducuahn vedecuihca che va nación yahn Egipto, ne numacuahn vedeyeno chuhrihn ye, din tañ ihyan nduco ye nduhca che din tañ ihyan nduco Dihvo vo Jesucristo. Tihca din ye, te chichahtino ye Dendiohs che ndahco menun ye yahn ye. ²⁷Nducote chitahno ye Dendiohs ne, andahre ama tañ rey me, ate nde hua din vah ye ihyan, chica ye nación yahn Egipto. Tihca din ye, te din chahtino ye Dendiohs, ihyan min che va ye vahchetero.

²⁸Nducote chitahno ye Dendiohs ne, din ye vihco ro yudo, ne chihquentiyon ye ihyan nación yahn Israel che cahnan ye yun yahn itecuche cahya nan yahn yahn chendevah vaco ye, cava che, cuahn che dechuh Dendiohs ángel me ne, ndihchero ye, ne hua cahno ye ðaya ye che menañ. ²⁹Ihyan nación yahn Israel ne, chitahno ye Dendiohs, ne chemin che chi chuh ye mendahn Nuniyahn Cuah anduhñeca che chuh ye nan yahn cuma. Ate cuahn che chuh sandado yahn Egipto che ndah se ihyan chahn ne, chendih nune sahn, chanorine se.

³⁰Adiva ne, nducote chitahno ihyan chahn Dendiohs ne, chihno ndache ro che chacondutonan ye chete yahn yan Jericó ne, ndora. ³¹Rahab, ama ndahta che ndere quechica te ro menañ ne, chitahno te Dendiohs, ne nevahñecun te sandado yahn nación yahn Israel che vatechica se rendihchero ndudo se. Chemin che ndevahn te, hua chih te ðama nduco ihyan che chahcotahn ye yahn Dendiohs.

³²Ama yahn ca ihyan che chitahno ye Dendiohs, co nte vo yahn ye. Ate cava che hua nduh condah yuhn vo ne, atenan tama te o ye ntihyon yan ihyan, nduhca Gedeón mañ, Barac mañ, Sansón mañ, Jefe mañ, David mañ, Samuel mañ, ihyan profeta chenahn mañ. ³³Ihyan chahn ne, nducote chitahno ye Dendiohs ne, nahñ ye ne, ndahco ndiya ye ndeh nación. Nahñ ye ne, ndahca chihquentiyon ye. Nahñ ye ne, chinan Dendiohs ihyan nduhca che cah ye ndudo yahn ye ihyan. Nahñ ye ne, cuahn che tañh nun ye León ne, ndedevahn Dendiohs ihyan, hua cheh te ihyan. ³⁴Nahñ ye ne, ndedevahn Dendiohs ihyan

van ruchiyahn, ne hua chiche ye. Nahn ye ne, ndedevahn Dendiohs ihyan tin espada, ne hua dehva chi yahn ye. Nahn ye ne, andahre hua dito ye, cah dito Dendiohs ihyan. Nahn ye ne, chinan Dendiohs ihyan van canda, ne ndahco ndiya ye sahn che ruhn se nduco ye. ³⁵Namin nahn ihyan ndahta, ndedetuhche Dendiohs tenahn yahn ye.

Nahn ye, andahre cah rihn sahn nunde ihyan, chihno se ihyan, ate hua chacondah vedame ye Dendiohs, te chenan ino ye che ndeva ye ihyan, cuahtenan ye vahchetero. ³⁶Nahn ye ne, din duche yahn se ihyan man, chahn se ihyan man, chiquiyahito se cadena ihyan man, chih se ihyan vacoyahn man. ³⁷Nahn ye ne, chihno se ihyan nduco tu. Nahn ye ne, chihca mahñ se ihyan. Nahn ye ne, tumarande se ihyan. Nahn ye ne, chihno se ihyan nduco espada. Nahn ye ne, chahtechica muhn chahtechica min ye, atenan dima itecuche man, chivato man, chahtenun ye. Chahtechica ye vedevah vedecheh, din tan ihyan nduco ye. ³⁸Rahtenan muhn rahtenan min ye, yahn nan che metah duhva man, van icoyahn man, iveyava man, dutiyahn man. Nducoyaca ihyan chahn ne, che cava ihyan nunde ne, nde hua redin yahn che tihca chuhrihn ye, chahtechica ye. ³⁹Nducoyaca ihyan chahn ne, andahre nedin yahn Dendiohs ihyan yahn che chitahno ye ihyan, ate metah conan conahn nduco ye nducuahn che necah ye ndudo yahn ye ihyan, ⁴⁰te a ndihco cade ye che cuahtenan rino ihyan chahn nde nda ro che dama ndeva ye uvo nduco ye vahchetero.

Cohahtino vo Dihvo vo Jesucristo

12 ¹Nducote ama yahn ihyan chahn chitahno ye Dendiohs, chihco ro ye van vo nduhca che chitahno ye ne, chemin che nahn che nuhn ino vo, cahcoman vo che rahtechico vo vedeyeno yahn man vo, rahtendihco vo nunde, ne nduhca sahn che numa ino se rano se cade, nde nan che quendahn nan se, tuno se nan yahn cade ne, tihca quendi vo numacuahn vedechahtino, dinahn vo che nahn Dendiohs. ²Nahn che cohahtino vo Dihvo vo Jesucristo, ihyan min che tihyon yune ye uvo che chitahno vo Dendiohs man, din ye che tuno vo nan ye man. Ihyan min ne, chihco mendahn ye ihyan, quenah yah ye nan cruz. Hua tumacah ye andahre

ama chuhrihn ye, ne numacuahn vedecuihno chih ye, te a devano ye te cuihno min ne, ama co yeno ye. Man ne, va ye vahchetero, lado tah cuaco Dendiohs.

³Condedecadino nchuhn nduhca che ama chuhrihn Dihvo vo Jesucristo, din tan ihyan nunde nduco ye cava che quendi ne yune yahn ye, ne hua co doh ino ne man, cava che hua cahcoman ne man. ⁴Dehve rahco ne, andahre ama rechuhrihn ne, redin tan ihyan nunde nduco ne, ate vate ca dihno vo che nde tahque rechuhrihn ye, nde rihno ihyan nunde ihyan. ⁵A devano ne nduhca che rahn Dendiohs, ndirun nan Ndudo yahn ye tuhca:

Daya, u che Dihve nchuhn, redin castigo nchuhn cava che ndah yahn ne.

Cuenevahnecon ne. Hua co ndache ne.

⁶A devano ne te ihyan che a nedin daya ihyan, che yahino ihyan ne, a ihyan chahn che redin castigo ihyan cava che ndah yahn ye.

⁷Codin chahtino ne yahn che redin Dendiohs castigo nchuhn, te rendihche ye nchuhn nduhca daya ye, ne a cava che ndah yahn ne che tihca redin ye. A devano vo te nducoyaca ihyan redin ye castigo daya ye cava che ndah yahn. ⁸Ihyan che hua redin Dendiohs castigo ihyan nduhca che redin ye castigo nducoyaca daya ye cava che ndah yahn ne, ihyan chahn che hua redin yahn ye ihyan. ⁹Cuahn che tave indihthe yuhn vo uvo ne, din ye castigo uvo cava che ndah yuhn vo. Nducote nevahnecon vo ihyan ne, nde tahque redin yahn che nevahnecon vo Chido vo che va ye vahchetero, che redin ye castigo uvo cava che ndahca cuahtenan vo. ¹⁰Cuahn che chechahya uvo ne, din indihthe yuhn vo castigo uvo cava che ndah yuhn vo anduhneva che tuno vederendedecadino yahn ye. Ate tahque ndah ro yuhn vo che redin Dendiohs castigo uvo, te nahn ye che ndah ihyan co vo nduhca che ndah man ye. ¹¹Cuahn che redin Dendiohs castigo uvo ne, hua renan ino vo, te ama rechuhrihn vo. Ate cuahn che tuma cuahn vo castigo yahn ye ne, ama cochihve yuhn vo cava che runecade cuahtechico vo, cuahte dihn chedave yuhn vo.

Ama cahnda che cuahcotahn vo yahn Ndudo yahn Dendiohs

¹²Nducote ama richihve castigo che redin Dendiohs uvo ne, chemin che cuenechah yan nchuhn chedave yahn ne, hua

co ran ne. ¹³Codin ne cuande, ne numa ino ne runecade cuahtechica ne cava che cua cuande ihyan che ndache ino ye, ne necah yan ye chedave yahn ye, quendi ye yune yahn ne.

¹⁴Codin nchuhn cuande, ne runecade cuahtechica ne, hua cuahte canda ne nduco ihyan. Tihca, te ihyan che hua runecade ye ne, hua tuno ye nan Dihvo vo Dendiohs. ¹⁵Nducoyaca nchuhn ne, cuihco ne cudado cava che quendi Dendiohs din yahino ye nchuhn. Hua ndihche tan ne vih, detohnan ne chedave yahn man ne man, ihyan chenahn man. ¹⁶Hua cuahtenan nde ama nchuhn nduco ihyan che hua nihnevaco nduco ne. Nde hua tehche tah ne che ndah yahn ne, nduhca che din Esaú, che nduco tahsihn comida chahcorun se ndudo ndah che va che cahco chida se cava se yahn che sahn menan se. ¹⁷A devano ne te cuahn che nda ro che cahco chida se ndudo ndah cava se ne, hua ndaca se andahre ama chaco se, te a ntihcue se.

¹⁸Ihyan ndico yuhn vo ne, ndere chuhrihn ye, chahn ye tingüete me, quenan ye canedihya. Min ne, ama chiche man, ama chi man man, ama chi yudo man. ¹⁹Chihnevan ye che tive corneta man, che nte Dendiohs nduco ye man, ne nducote ama yudo ndudo yahn ye ne, chica ye favor ihyan che metah quendi ye cahma ye. ²⁰Dihya ihyan chahn chi yahn che ama chihco yudo Dendiohs tingüete me, te chihquentiyon ye che andahre ama ite che cahñ nda te min ne, va che cahno ihyan ite nduco tu, o nduco lanza. ²¹Ama yudo chi min, che nde man Moisés ne, ama dihya ye chi, nde tuno rendoh ye che vah ye.

²²Ate uvo ne, tahque ndah ro yuhn vo, te ndotenan che cuhn vo tingüete me ne, tuno vo vahchetero nan va Dendiohs, ihyan min che ama yudo vederihquentiyon yahn ye. Min chenacade mil ángel, rendeva ye yavenan ye numacuahn vedeyeno. ²³Uvo ne, a ndi cuande vo vahchetero, ne va che ndo damo vo nduco nducoyaca ihyan yahn Dendiohs che vate ye min. Uvo ne, ndichahtino vo Dendiohs, ihyan min che techecade ye yahn nducoyaca ihyan nunde. ²⁴Namin ndichahtino vo Dihvo vo Jesucristo, ihyan min che a va tah ye vederihquentiyon ra, rahn nan ye uvo nan Dendiohs. Ihyan min ne, chihco mendahn ye ihyan, chera yun yahn ye cava che nchahco Dendiohs nunde yuhn vo. A devano vo te namin chera yun yahn Abel, ate hua chichihve cava nde ama ihyan.

²⁵Cuihco nchuhn cudado, ne hua cuahcotahn ne yahn Dendiohs, ihyan min che va ye vahchetero, che riyahve ye nchuhn. Nducote hua ndevahn ihyan ndico yuhn vo che chahcotahn ye yahn ye ro che yahve ye ihyan tingüete me ne, tahque uvo ne, hua ndevahn vo ndete che cuacondah vedamo vo ihyan. ²⁶Ro min che yahve ye ihyan chahn ne, nde yahn nuhn. Tahque man ne, nde tahque yudo, te rahn ye: “Tama yune ne, ndiyu deman yahn din che nuhn, te namin nde nducuah che chenana ro din che nuhn.” ²⁷Nducote rahn ye che “tama yune” ne, a devano vo te ndedetoh ye nducuah dehtenduh che va che cuihno, ne nuhnde deman dehtenduh che a nihnde cade che hua cuihno. ²⁸Chemin che necah vo nundihve cuahn Dendiohs, te vederihquentiyon che te ye uvo ne, hua nda ro che cuihno. Ndeva vo yavenan ye numacuahn chedave yuhn vo nduhca che renan ino ye. ²⁹Tihca, te Dendiohs yuhn vo ne, ama yudo vederihquentiyon yahn ye nduhca yahn che redin che rendo iya dehtenduh.

Nduhca che nahn Dendiohs che cuahtechico vo

13

¹Cuiquendi nchuhn din yahino ne ama tama ne vih. ²Cuenevah necun ne ihyan chenun yune che nda ye ndevaco ne, te van ihyan che renevah necun ye ihyan chenun yune ndevaco ye ne, chahte ihyan che nevah necun ye nde angel andahre nde hua tumacadino ye.

³Conan vahino ne ihyan che chenun ye vacoyahn anduhneca ndete che man ne chenun ne vacoyahn. Conan vahino ne ihyan che rechuhrihn ye, redin tan ihyan nduco ye, te namin nchuhn ne, iyehse vate ne.

⁴Nducoyaca nchuhn che nihnevaco ne ne, hua ndere cuahtechica ne nduco ihyan che hua nihnevaco nduco ne, te Dendiohs ne, din ye castigo nducoyaca ihyan che ndere rahtechica ye nduco ihyan che hua nihnevaco nduco ye man, nducoyaca ihyan che redin duche yahn ye che a nihnevaco ye man.

⁵Hua cuahcoran nchuhn cava tume. Cuahtenan ne vedeyeno nduco che a va yahn ne, te rahn Dendiohs: “Hua cahcoman nchuhn, nde hua cuacondah vedame nchuhn.” ⁶Chemin che nahn che cochahtino vo ihyan nduhca che chichahtino ihyan ndico yuhn vo che dirun ye tuhca:

Dihvé Dendiohs ne, a ihyan min che rinan ye u.
 Chemin che hua dehve rahcó, andahre din tan ihyan
 nducó.

⁷Condihche ne ihyan ndinan yahn ne che cahndudo ye
 Ndudo yahn Dendiohs, chihnevan ne. Cuihco nchuhn cudado
 nduhca che vatechica ye, ne cuiquendi ne yune yahn ye,
 cuitahno ne Dihvo vo Jesucristo nduhca che ritahno ye.

⁸Dihvo vo Jesucristo ne, ama no vederihquentiyon yahn
 ye. Numacuahn ro, nde nan che canan, nde meniyon, nde ro
 che cochi ne, hua ndacorun. ⁹Hua quendi nchuhn dehtenduh
 costumbre che ricuahn ihyan. Tahque ndah che cochahtino
 ne Dendiohs, ihyan min che yahino ye nchuhn, che co che
 quendi ne ama ndeh nan costumbre nan dehtenduh che reh
 ne, te costumbre chemin chan ne, hua richihve nde cava man
 ihyan che riquendi ye. ¹⁰Nan vederihquentiyon ndico me ne,
 rihco chidocuyan chahn vedino nan ta, ne nan ntiyon min
 riquendah che reh ye. Ate man che ndahco cade Dendiohs
 vederihquentiyon min ne, tahque ndah ro yuhn vo che co
 ihyan chahn, te Dihvo vo Jesucristo ne, chi ye nduhca ama
 vedino nan Dendiohs, chih ye cava nunde yuhn vo. ¹¹Nan
 vederihquentiyon ndico me ne, renda chidocuyan che tahque
 ndinan Nan Ta che Tahque Yudo, nda ye yun yahn ite che ri
 vedino cava che nchahco Dendiohs nunde yahn ihyan. Me yute
 yahn te ne, riquiyahn ye ama lado, cuahn chihto yan. ¹²Namin
 Dihvo vo Jesucristo ne, cuahn chihto yan nahn yah sandado
 ihyan, chih ye. Min chera yun yahn ye cava che nchahco
 Dendiohs nunde yuhn vo, nedin yahn ye uvo. ¹³Chemin che
 cochahtino vo Dihvo vo Jesucristo, quendi vo yune yahn ye,
 andahre ndahchenan ihyan uvo, nduhca che chahno man ye.
¹⁴A devano vo te ndiyu muhn iyehanse cuahtenan vo cuahn
 dama, te chenan ino vo che ndeva Dendioh uvo, cuahtenan vo
 vahchetero numacuahn ro. ¹⁵Nducote tihca ne, cochahtino vo
 Dihvo vo Jesucristo, ndeva vo yavenan Dendiohs cuahn dama,
 cahnevan ihyan chenahn. Chemin ne, anduhneca ama vedino
 che cah vo Dendiohs. ¹⁶Codin nchuhn che ndah man, codin ne
 vedevahino nduco ihyan che va vederetahn yahn ye man, te
 chemin che renan ino Dendiohs.

¹⁷Cuenevahneacun nchuhn ihyan ndinan yahn yaco, codinahn
 ne yahn ye, te ihyan chahn che nda cuande ye nchuhn, ne va

che necah cuande ye Dendiohs cava ne. Runecade cuahtenan nchuhn cava che hua cuih ne vederan ihyan chahn, ne co yeno ye cava ne, te ndete che hua runecade cuahtenan ne ne, nde hua cochihve che redin ne.

¹⁸Covah nchuhn cava nuhn. A devano nuhn te runecade vatechica nuhn, ne nahn quendi nuhn din nuhn che ndah.

¹⁹Nde tahque nahn che covah nchuhn cava che cuahnecun Dendiohs che hua condah ndaconan chí quendihcheró nchuhn.

²⁰A Dendiohs che redin ye che rahte dihn chedave yuhn vo man, che ndedetuhche ye Dihvo vo Jesucristo man, ihyan min che ndah redin ye cudado uvo nduhca che redin ihyan cudado itecuche yahn ye. Dihvo vo ne, chihco mendahn ye ihyan, chih ye, chera yun yahn ye, din ye che chinahn vederihquentiyon ra che hua nda ro che cuihno. ²¹Chemin che din Dendiohs che cuahtenan cuma nchuhn vederihquentiyon yahn Dihvo vo Jesucristo cava che runecade cuahtenan ne, din ne che ndah nduhca che nahn ye. Ndeva vo yavenan Dihvo vo cuahn dama. Tihca co.

²²Dihno, dirun tah yahn ne, ne ricá nchuhn che din chahtino ne che riyahvé nchuhn. ²³Reté, checadino nchuhn te dihno vo Timoteo ne, a ndiquendah se vacoyahn. Ndete che nda nun se muhn ne, quenda sahn cuahn che chí quendihcheró nchuhn.

²⁴Cuenecah ne Dendiohs nducoyaca ihyan ndinan yahn yaco man, nducoyaca dihno vo chenhahn man. Cuendeva ne Dendiohs yahn dihno vo che vate ye naci6n yahn Italia.

²⁵Dendiohs din yahino ye nducoyaca nchuhn. Tihca co.